

**Ўзбекистон Миллий антидопинг агентлигининг вазифалари ва функцияларини
волонтёрлик орқали нисбатан самарали ва тежамли шаклда амалга ошириш тартиби
тўғрисида
НИЗОМ**

1-боб. Умумий қоидалар

1. Ушбу Низом Ўзбекистон Республикасининг 2019 йил 2 декабрдаги «Волонтёрлик фаолияти тўғрисида»ги ЎРҚ-585-сонли Қонуни, Ўзбекистон Республикаси Президентининг 2021 йил 4 мартдаги ПФ-6181-сон Фармони билан тасдиқланган 2021-2025 йилларда фуқаролик жамиятини ривожлантириш концепциясида белгиланган вазифалар ижросини таъминлаш мақсадида, Ўзбекистон Республикаси Вазирлар Маҳкамасининг 2022 йил 11 апрелдаги «Волонтёрлик фаолиятини янада қўллаб-қувватлаш чора-тадбирлари тўғрисида»ги ВМҚ-169-сонли Қарори асосида ишлаб чиқилиб, Ўзбекистон Миллий антидопинг агентлигининг (кейинги ўринларда – Агентлик) вазифалари ва функцияларини волонтёрлик орқали нисбатан самарали ва тежамли шаклда амалга ошириш тартибини белгилайди.

2-боб. Волонтёрларни Агентлик фаолиятига жалб этиш

2. Агентликнинг вазифа ва функцияларини волонтёрлик орқали нисбатан самарали ва тежамкор шаклда бажариш ушбу Низомга иловадаги схемага мувофиқ амалга оширилади.

Вояга етган, волонтёр сифатида жалб этилаётган соҳа бўйича билим ва кўникмага эга бўлган Ўзбекистон Республикаси фуқаролари ва фуқаролиги бўлмаган шахслар Агентлик фаолиятига волонтёр сифатида жалб этилиши мумкин.

3. Қуйидаги фуқароларнинг Агентлик фаолиятига волонтёр сифатида жалб этилишига йўл қўйилмайди:

- муомалага лаёқати белгиланган тартибда чекланган ёки муомалага лаёқатсиз деб топилган;

- волонтёр сифатида жалб этилаётган соҳа бўйича етарли билим ва кўникмага эга бўлмаган;

- Агентлик ходими (корпоратив волонтёрлик бундан мустасно);

- ўзига нисбатан жиноят иши қўзғатилган, шунингдек, қасддан жиноят содир этганлик учун судланганлик ҳолати тугалланмаган ёки судланганлиги олиб ташланмаган;

- жиноий жазони ўтаётган;

- белгиланган вазифаларни амалга оширишга монелик қиладиган касаллиги ёки жисмоний нуқсон мавжуд бўлган;

- ҳақиқий ҳарбий хизматдаги шахслар;

- диний ташкилотларнинг профессионал хизматчилари.

4. Профессional ва олий таълим муассасаларида таълим олаётган фуқаролар ушбу таълим муассасаларидаги таълимдан ташқари вақтларда волонтёрлар гуруҳи таркибида волонтёрлик фаолиятини амалга ошириши мумкин.

5. Агентлик бош директори томонидан амалга оширишга волонтёрлар жалб этиладиган Агентликнинг вазифалари ва функциялари рўйхати тасдиқланади.

Бунда Агентликнинг қуйидаги таркибий тузилмаларига волонтёрларнинг жалб этилишига йўл қўйилмайди:

- пул маблағлари билан боғлиқ операцияларни амалга оширувчи (Бухгалтерия хизмати);

- махфий маълумотларни сақловчи ва улар билан ишловчи (Допинг синовларини режалаштириш ва терапевтик истиснолар бўлими, Антидопинг қоидабузарликлар ва АДАМС мониторинги бўлими);

- инсон ҳаёти учун хавfli бўлган, бажарилиши алоҳида билим ва кўникма талаб этадиган вазифаларни амалга оширувчи.

6. Агентлик доимий равишда ўзининг расмий веб-сайтларида ва ижтимоий тармоқлардаги саҳифаларида ўз фаолиятига волонтерларнинг жалб этилиши бўйича танлов ўтказилиши ҳақида эълон бериб боради.

Эълонда волонтерлар жалб этиладиган Агентликнинг фаолият йўналиши ҳамда талабгорларга қўйиладиган талаблар кўрсатилади.

7. Волонтерларни саралаб олиш бўйича танлов Агентликда ташкил этиладиган комиссия томонидан амалга оширилади.

Комиссия Агентликнинг тоқ сондаги масъул ходимларидан иборат таркибда шакллантирилади. Унга ёшлар билан ишлаш ваколати юклатилган Агентликнинг масъул ходими (кейинги ўринларда – Агентлик бош директорининг маслаҳатчиси – маслаҳатчи) раислик, Допинг назорати бўлими ҳамда Антидопинг таълим дастурлари бўлими бошлиқлари аъзолик қилади.

8. Танлов суҳбат асосида ўтказилади. Комиссия ташаббусига ёки талабгорнинг илтимосига асосан суҳбат жараёни аудио ёки видеоёзув воситалари орқали қайд этилиши мумкин.

Суҳбат якуни бўйича Агентликнинг волонтерлар жалб этиладиган фаолият йўналиши бўйича билим ва амалий кўникмага эга бўлган талабгорлар Агентлик ҳузуридаги волонтерлар гуруҳига (кейинги ўринларда — волонтерлар гуруҳи) қабул қилинади.

3-боб. Агентлик фаолиятига жалб этилган волонтерларни ҳисобга олиш

9. Агентлик бош директорининг буйруғига кўра Агентлик ҳузурида танлов натижаларига асосан танлаб олинган волонтерлардан иборат волонтерлар гуруҳи ташкил этилади.

10. Волонтерлар гуруҳига киритилган волонтерлар Агентликнинг инсон ресурсларини ривожлантириш хизмати томонидан Ўзбекистон ёшлар портали негизида яратилган волонтерлар электрон платформаси (кейинги ўринларда — электрон платформа) орқали ҳисобга қўйилади.

11. Волонтерларни электрон платформа орқали ҳисобга қўйишда қуйидагилар кўрсатилади:

- волонтернинг фамилияси, исми, отасининг исми;
- туғилган санаси;
- паспорти ёки идентификацияловчи ID-картаси маълумотлари;
- Агентлик ҳузуридаги волонтерлар гуруҳида фаолиятини бошлаган сана;
- волонтерлик фаолиятини амалга ошириш йўналиши.

12. Волонтернинг волонтерлар гуруҳида фаолият юритган даври доимий равишда электрон платформада акс эттирилади.

Бунда волонтер томонидан электрон платформа орқали волонтерлар гуруҳида фаолият юритган даври тўғрисида ҳар қандай пайтда QR-код (матрикс штрихли код) қўйилган маълумотномани юклаб олиш имконияти яратилади.

4-боб. Волонтерлар ишини ташкил этиш

13. Агентликнинг бош директорининг буйруғи билан ҳар йили волонтерлик дастури тасдиқланади.

Волонтерлик дастурида:

- Агентлик томонидан ўтказиладиган, жамоат учун фойдали бўлган вазифаларни ҳал этишга қаратилган чора-тадбирлар ва уларни амалга ошириш орқали кутилаётган натижалар;
- Агентликнинг волонтерлар жалб этиладиган фаолият йўналишлари кўрсатилади.

Волонтерлик дастурида қонунчиликда белгиланган бошқа чора-тадбирлар ҳам кўрсатилиши мумкин.

14. Волонтерлар ишини ташкил этиш маслаҳатчи билан келишилган ҳолда амалга оширилади.

Бунда у волонтерларга йўл-йўриқ кўрсатади, улар ўртасида ишни тақсимлайди, ҳар бир волонтернинг иш ҳажмини белгилайди, ишнинг улар томонидан бажарилишини назорат қилади, бошқа давлат органлари ҳузуридаги волонтерлар гуруҳлари билан ҳамкорликни йўлга қўяди.

5-боб. Волонтерларнинг ҳуқуқ ва мажбуриятлари

15. Волонтерлик гуруҳи аъзоси бўлган волонтер Агентлик фаолиятига кўмаклашиш доирасида қуйидаги ҳуқуқларга эга:

- Агентликда ўзи томонидан амалга ошириладиган фаолият йўналишини эркин танлаш;

- агар волонтер ҳамда Агентлик ўртасида тузилган волонтерлик шартномасида бошқача қоида назарда тутилмаган бўлса, Агентликдаги волонтерлик фаолиятини ҳар қандай вақтда эркин равишда тўхтатиш;

- Агентликка ўз лойиҳа ва дастурларини таклиф қилиш, уларни амалга оширишда ёрдам олиш;

- маслаҳатчидан, Агентликдан амалга ошириладиган волонтерлик фаолияти тўғрисида ишончли ахборот олиш;

- волонтерлик фаолиятини амалга ошириш учун ташкил этиладиган волонтерлик акциялари ва бошқа тадбирларда иштирок этиш;

- Агентликдан волонтерлик фаолияти давомида юзага келган йўл ҳақи, яшаш, овқатланиш харажатлари ва бошқа харажатларнинг қопланишини ҳамда зарурат туғилганда махсус кийим-бош, яқка тартибда ҳимояланиш воситалари, асбоб-ускуналар билан таъминлашни талаб қилиш;

- Агентликдан тавсиянома тусидаги хатларни олиш;

- хавфли, зарарли ҳамда ноқулай омиллар билан боғлиқ ишларни бажаришга жалб қилинганда Агентлик маблағлари ҳисобидан ҳаёти ва соғлиғини суғурта қилдириш.

16. Волонтерлик гуруҳи аъзоси бўлган волонтер Агентлик фаолиятига кўмаклашиш доирасида қуйидаги мажбуриятларга эга бўлади:

- волонтерлик фаолияти доирасида унинг зиммасига юклатилган вазифаларни аниқ, виждонан ва ўз вақтида бажариш;

- маслаҳатчини ўзига маълум бўлиб қолган волонтерлик фаолияти доирасидаги тадбирларни амалга оширишни қийинлаштирадиган сабаблар ҳақида ўз вақтида хабардор қилиш;

- волонтерлик фаолияти доирасида ўзига маълум бўлган Агентлик фаолияти билан боғлиқ маълумотларни, шунингдек, бошқа волонтерларнинг шахсга доир маълумотларини уларнинг розилигисиз ошкор қилмаслик;

- волонтерлик фаолияти доирасида фуқаролар ва ташкилотларнинг ҳуқуқлари ҳамда қонуний манфаатларини бузмаслик, ўз фаолияти билан учинчи шахсларга ва атроф муҳитга зарар етказмаслик;

- волонтерлик тадбирларининг бошқа иштирокчиларига, шу жумладан, ҳамкорлик олиб бориладиган муассасалар (ташкилотлар) ходимларига ҳамда бошқа волонтерларга ҳурмат билан муносабатда бўлиш;

- волонтерлик тадбирларини ўтказиш жараёнида маслаҳатчининг кўрсатмаларига амал қилиш;

- ўз фаолияти тўғрисида маслаҳатчига ҳисобот тақдим этиб бориш;

- волонтерлик фаолияти доирасида Агентликда ўрнатилган хавфсизлик, техника, санитария-гигиена ва ички тартиб-қоидаларга қатъий амал қилиш;

- Агентлик мулкига эҳтиёткорона муносабатда бўлиш.

6-боб. Агентликнинг ҳуқуқ ва мажбуриятлари

17. Агентлик ўз фаолиятига жалб этилган волонтерлар билан муносабатда қуйидаги ҳуқуқларга эга:

- волонтерлик дастурларини ишлаб чиқиш ва амалга ошириш;
- волонтерларни жалб қилган ҳолда волонтерлик акцияларини ўтказиш;
- волонтерлик гуруҳи аъзолари орасидан волонтерларни мувофиқлаштирувчини тайинлаш;

- волонтерлик гуруҳи аъзоларини ўқитиш учун таълим фаолиятини амалга оширувчи ташкилотларни жалб этиш, махсус семинарлар, ишчи учрашувлар ва волонтерларнинг учрашувларини ўтказиш;

- қонунчиликда белгиланган тартибда волонтерларни рағбатлантириш, шу жумладан, энг кўп ўзини кўрсатган волонтерларга тавсия тусидаги хатлар тақдим этиш ҳамда уларни рағбатлантириш ва (ёки) мукофотлаш учун номзодларни белгиланган тартибда тақдим этиш.

18. Агентлик ўз фаолиятига жалб этилган волонтерлар билан муносабатда қуйидаги мажбуриятларга эга:

- волонтерлик фаолияти тўғрисидаги қонунчилик талабларига риоя этиш;
- волонтерларни уларнинг хоҳиш-истагидан ташқари волонтерлик шартномасида кўрсатилмаган вазифаларни бажаришга мажбурламаслик;

- ўзининг фаолиятига жалб қилинган волонтер, агар у волонтерлик фаолияти билан ойига 20 соатдан кўпроқ банд бўлса, волонтер билан волонтерлик шартномасини тузиш;

- волонтерга режалаштирилаётган ҳамда амалга оширилаётган волонтерлик дастурлари ва волонтерлик акциялари, улар иштирокчиларининг сони, акциялар ўтказиладиган жой ҳамда вақт, уларни ўтказишга доир талаблар тўғрисида ахборот тақдим этиш, шу жумладан, ўз расмий веб-сайтига жойлаштириш орқали ахборот тақдим этиш;

- волонтерлик фаолиятини амалга ошириш чоғида волонтерларнинг ҳаёти ва соғлиғи учун хавфсиз шарт-шароитлар яратиш, шунингдек, волонтерларга уларнинг Агентлик фаолиятига кўмаклашиши давомида юзага келган йўл ҳақи, яшаш, овқатланиш харажатлари ва бошқа харажатларни қоплаш ҳамда зарурат туғилганда махсус кийим-бош, якка тартибда ҳимояланиш воситалари, асбоб-ускуналар билан таъминлаш;

- хавфли, зарарли ҳамда ноқулай омиллар билан боғлиқ ишларни бажаришга жалб қилинганда ўз маблағлари ҳисобидан волонтерларнинг ҳаёти ва соғлиғини суғурта қилиш.

7-боб. Волонтерлик шартномаси

19. Агар Агентлик фаолиятига жалб этилган волонтер ойига 20 соатдан кўпроқ волонтерлик фаолияти билан банд бўлса, волонтер билан волонтерлик шартномаси тузилади.

Волонтерлик шартномаси икки нусхада расмийлаштирилади, улардан бири Агентликда, иккинчиси эса волонтерда сақланади.

20. Волонтерлик шартномасида «Волонтерлик фаолияти тўғрисида»ги Ўзбекистон Республикаси Қонунининг 17-моддасида белгиланган шартлар кўрсатилиши лозим.

21. Агар волонтерлик шартномасини бажариш жараёнида волонтернинг зиммасига юклатилган мажбуриятларни амалга оширишни қийинлаштирадиган ҳолатлар тарафларга боғлиқ бўлмаган сабабларга кўра юзага келса, шартнома қайта кўриб чиқилади.

22. Агар волонтерлик шартномасини бажариш жараёнида тарафларга боғлиқ бўлмаган сабабларга кўра шартномани бундан буён бажариш мумкин бўлмай қоладиган ҳолатлар юзага келса, шартнома тарафлардан бирининг ташаббусига кўра бекор қилинади.

23. Волонтерлик шартномасини бир томонлама тартибда бекор қилиш, агар волонтерлик шартномасида бошқача қоида белгиланмаган бўлса, волонтер томонидан ёки Агентлик томонидан бу ҳақида етти кун олдин дастлабки тарзда хабардор қилиш шarti билан ва сабабларни кўрсатиш мажбуриятларисиз амалга оширилади.

24. Якка тартибдаги меҳнат шартномасини ёки хизматлар кўрсатиш тўғрисидаги фуқаролик-ҳуқуқий шартномасини ёхуд шу каби ҳар қандай бошқа шартномани тузишдан бош тортиш мақсадида волонтерлик шартномасини тузиш тақиқланади.

8-боб. Волонтерлар гуруҳи аъзолигидан чиқиш

25. Волонтёр ўзи истаган ҳар қандай пайтда волонтёрлар гуруҳи аъзолигидан чиқиши ва у билан тузилган шартномани бекор қилиши мумкин.

Волонтёр бу ҳақида маслаҳатчини икки кун олдин огоҳлантириши лозим.

26. Волонтёрнинг волонтёрлар гуруҳи аъзолигидан чиқиши Агентликнинг инсон ресурсларини ривожлантириш хизмати томонидан электрон платформада қайд этилади.

Бунда волонтёрнинг волонтёрлар гуруҳида аъзолиги давридаги фаолияти маслаҳатчи томонидан 10 баллик тизимда баҳоланиши мумкин.

27. Қўйидаги ҳолларда волонтёрлик шартномаси Агентлик томонидан бекор қилиниши лозим:

- волонтёр волонтёрлик шартномаси шартларини икки ёки ундан ортиқ марта узрли сабабларсиз бузганда;

- волонтёр суд томонидан муомалага лаёқатсиз деб топилганда;

- волонтёрга нисбатан суднинг айблов ҳукми қонуний кучга кирганда;

- волонтёр вафот этганда ёки суднинг уни вафот этган деб эълон қилиш ҳақидаги қарори қонуний кучга кирганда;

- волонтёрнинг волонтёрлик шартномаси шартларини бажаришига монелик қиладиган бошқа ҳолларда.

28. Волонтёр волонтёрлик гуруҳидан чиққан тақдирда, волонтёрлик дастурида белгиланган чора-тадбирларни амалга ошириш учун Агентлик ушбу Низомда белгиланган тартибда ўтказиладиган танлов орқали волонтёрларни жалб этиши мумкин.

9-боб. Яқунловчи қоида

29. Ушбу Низом талабларини бузишда айбдор бўлган шахслар қонунчилик ҳужжатларида белгиланган тартибда жавоб берадилар.

Агентликнинг вазифалари ва функцияларини волонтёрлик орқали нисбатан самарали ва тежамли шаклда амалга ошириш тартиби тўғрисидаги низомга

ИЛОВА

Агентликнинг вазифалари ва функцияларини волонтёрлик орқали нисбатан самарали ва тежамли шаклда амалга ошириш

СХЕМАСИ

Босқичлар	Субъектлар	Тадбирлар	Муддатлар
1-босқич	Агентлик	Агентлик бош директори амалга оширишга волонтерлар жалб этиладиган Агентликнинг вазифалари ва функциялари рўйхатини ва волонтерлик дастурини тасдиқлайди	Ҳар йили
2-босқич	Агентлик	Ўзининг расмий веб-сайтларида ва ижтимоий тармоқлардаги саҳифаларида ўз фаолиятига волонтерларнинг жалб этилиши бўйича танлов ўтказилиши ҳақида эълон бериб боради Эълонда волонтерлар жалб этиладиган Агентликнинг фаолият йўналиши ҳамда талабгорларга қўйиладиган талаблар кўрсатилади	Доимий равишда
3-босқич	Агентликда этиладиган комиссия	Суҳбат асосида волонтерликка номзодларни саралаб олади	Танлов якунларига кўра
4-босқич	Агентлик	Агентликнинг волонтерлар жалб этиладиган фаолият йўналиши бўйича билим ва амалий кўникмага эга бўлган талабгорлар Агентлик ҳузурида ташкил этиладиган волонтерлар гуруҳига қабул қилинади ҳамда Агентлик инсон ресурсларини ривожлантириш хизмати томонидан Ўзбекистон ёшлар портали негизида яратилган волонтерлар электрон платформаси орқали ҳисобга қўйилади	Суҳбат якуни бўйича
5-босқич	Агентлик ёки волонтер	Агентлик ёки волонтернинг хоҳишига кўра волонтерлик шартномасини бир томонлама бекор қилади.	Ҳар қандай вақтда иккинчи тарафни шартномани бекор қилиш ҳақида етти кун олдин огоҳлантирган ҳолда